

Camarada-Aruba ta gradici pa un dia inolvidabel pa dienstplicht



ORANJESTAD -- Diasabra 31 di augustus ultimo CAMARADA-Aruba a tene actividadnan den cuadro di 50 aña di servicio militar obligatorio na Aruba. Ta na aña 1963 cu Reino Hulandes a introduci e servicio militar obligatorio pa e tempo ey Antias. Esaki a ser haci pa medio di e decreto "Dienstplichtverordening" (P.B. 1961, nr. 223) y "Dienstplichtbesluit" (P.B. 1963, nr. 86). Desde e tempo ey diferente hoben di Aruba a cuminsa cumpli cu nan servicio militar obligatorio na Marinierskazerne Savaneta. Na Aruba e hobennan di Aruba y di Bonaire a sirbi pa 12 luna. Diferente di nan

despues a haya trabounan clave y importante den comunidad. Algun di nan a subi di rango despues pa bira instructor y lider den e cuerpo militar Arubano.

Na 1986 Aruba a haya su "Status Aparte", pero a sigui cu e servicio militar obligatorio. Na 1996 gobierno di Aruba a dicidi pa vries e obligacion pa presenta (opkomstplicht). Desde e aña ey nos hobennan por cumpli cu e servicio militar a base boluntario.

Riba diasabra ultimo e ex militarnan a participa na un parada den cayanan di Playa y atardi den cayanan di San



Nicolas. Tambe a tuma luga un trayecto di marcha forsa, miho conoci como "speed-mars". Esaki a sali di Playa bay Savaneta pasando den diferente bario. E marcha aki a termina a marinerskazerne Savaneta caminda nan a ser ricibi pa e Comandante Jan ten Hove. Aki e ex militarnan presente a ser elogia pa a sirbi den defensa di nan pais. Un medaya conmemorativo a ser otorga na e comandante y despues a tene un (1) minuut di silencio pa e ex militarnan cu a fayece. Tambe a presencia e ceremonia di baha bandera. Pa finalisa e dia a duna un brindis na Young Fellow na e participantenan di e dia inolvidabel aki.

Directiva di CAMARADA-Aruba ta gradici tur e participantenan, e colaborado nan y e comision temporal "Comision

50 aña Dienstplicht" cu a traha duro pa yuda realisa e dia aki y e miembros nan di CAMARADA mes. Un danki ta bay tambe na Cuerpo Policial, e drumband di "Grupo Scout St. Paul Michael, cu a guia e parada na Playa y e D-J di Andy Willems cu a guia e parada na San Nicolas. Tambe ta

bay un danki na marinerskazerne Savaneta y en special su Comandante cu a yuda e participantenan recorda nan tempo den e kazerne. Por ultimo un danki ta bay na tur otro instancia, organisacion y persona cu a haci un donacion y/of cu a coopera y/of colabora cu CAMARADA-Aruba pa haci e dia aki bira un exito. □

